



▲Bohlaeng Lanz Dwzguih.

Bihaenx, daxmeh ngamq ndaej 25 bi, baenzlai lwg au ciengx, gij ndwenngoenz ranz dou sikhaek couh gvaq mbouj ndaej roengz lo. Gyo-mbaiq bungz bohlaeng, doeklaeng daxmeh gaijhaq hawj bohlaeng, bohlaeng hix nyienh ciengx dou sam cejnuengx.

Bohlaeng heuhguh Lanz Dwzguih, dwg vunz Hozciz Si Duh' anh Yauzcuz Swciyen. 1951 nienz 1 nyied, de camgya Cunghgoz Yinzminz Ciyenginh, riengzlaeng bae coh Cauzsenj camgya Gang Meijgoz Bang Cauzsenj Cancwngh. Gaxgonq de guh boux bubingh, doeklaeng gaij guh baubingh. De guh boux bubingh, caeuq gyoengq canyouj gaj vunzdig lumj gvej em nei, lae lwed lae hanh; guh boux baubingh, de caeuq canyouj dox boiqhab, dwk bau boedboed caq vunzdig. Youq ndaw hoenxcienq, de

maenh' ak fouzbeij, laeb goenglauz gvaq, hix deng sieng naek gvaq, ndaej nyinhdingh dwg ndangcanz sam gaep. Aenvih de ndeimaenh, 1954 nienz, ndaej miznaj gyahaeuj Cunghgoz Gungcanjdangj.

1956 nienz 4 nyied, de daj budui cienjnieb, ndaej anbaiz daengz Liujcouh Si Ganghdezcanj guhhong. Gvaqlaeng, baihgwnz baij de daengz Lozyez Yen guhhong. De mbouj gangj vah' ienq, daiq geij cib boux vunz bae daengz Lozyez Yen Swnhlinz Gunghyezgiz guhhong (seizneix dwg Gvangjsih Bouxcuengh Swcigih Goz-youj Yajcangz Linzcangz), youq giz-neix baez guh, couh itcig guh daengz duiyouh.

Youq ndaw linzcangz fwj heux mok geuj, bohlaeng yienznaeuz guh lingjdaui, hoeng de caeuq lajfwngz itheij hoh faex re feiz, fungj faex ndaem miuz, fag faex doek ceh, vih guekgya canh ngaenz, vih linzcangz aeundaej haujlai mingzdaeuz. De mbouj lau gwn haemz mbouj lau gwn hoj bae guhhong, ciengzseiz ndaej bingzguh bouxvunz senhcin caeuq boux gungcanjdangjyenz ndeimaenh, baenz gij yienghndei vunzlai. Gij saekloeg buh bouxbing caeuq gij saekloeg ndoengfaex doxdoengz, doengzcaez yungz haeuj ndaw ndang

de bae, doengzcaez gaek haeuj ndaw ndok de bae.

Miz baez ndeu, youh bingz de guh boux gungcanjdangjyenz ndeimaenh, lij miz ngaenzciengj hajcib maenz. Lai baez heuh de bae lingx gij ngaenzciengj neix, hoeng, de cix giengiet doi naeuz: "Gou mbouj au. Gij ngaenzciengj neix louz hawj gyoengq vunz engq au yungh roxnaeuz giz linzcangz au yungh ba!" 20 sigij 60 nienzdaui, hajcib maenz dwg ngaenz lai raeuh lo! Seizneix haujlai vunz nyinhnaeuz de baenzneix guh bamz lai, hoeng neix couhdwg bohlaeng gou, dan guh saeh ndwi, mbouj ngeix ndaej ciengj ndaej ngaenz, de itcig dwg aen yienghndei gou.

Gij bouxbing camgya gvaq Gang Meijgoz Bang Cauzsenj, duivuj le ndaej yiengjsouh di cwngeuz ndei. Hoeng bohlaeng gou itcig daengz gvaqseiq, hix mbouj ndaej yiengjsouh gvaq. De bonjfaenh coengzlaiz mbouj bae ceng' au gijneix gvaq. Gou siengj: Ndawsim de itdingh lumj haujlai bouxbing laux nei, mbouj caeuq guekgya heuh au neix au de, mbouj siengj hawj dangjuciz dem fanz dem you. Couh lien gep baizbenj iqetet "Aenranz Miznaj", hix dwg de gvaqseiq song ndwen le cij soengq

daengz ndawranz caemhcai q venj hwnj gwnz bakdou bae.

Bohlaeng yienznaeuz mbouj dam cam mingzleih, hoeng ciengzseiz geiq ndaej caeuq vunz doxndei doxhuz. Mwh gou lij iq, baez gvaq cieng, gaj moucieng seiz, bohlaeng cungj bae heuh ranznden daeuj, doengzcaez gaj moucieng faen nohmou. Engqlij boux vunzseng gvaq najdou, de hix nyienh soengq di noh moucieng. De naeuz gvaqcieng ndaej gaj mou, gwn nohmou dwg gij saeh angq saeh git, au hawj caezgya caez daeuj cimz. Gij boek-saed, ndatcingz bohlaeng yingjyangj gou laegled, hawj gou engq rox gij dauhleix guh vunz guh saeh.

Neix couhdwg bohlaeng gou, dwg bouxbing mbouj lau dai mbouj lau sieng, dwg bouxhenbya youq ndaw ndoengfaex gaenxguh cix lumzseuq mingzleih, engq dwg boux daxboh simndei simsienh.

Song daxboh gou yienznaeuz caeux couh gvaqseiq, hoeng cix vih dou yienh' ok gij bonjsaek bouxbing caeuq boux gungcanjdangjyenz. Songde dwg gij cansw gunghozgoz, youh dwg bouxguh hong vih yinzminz. Songde maenh' ak mbouj lau dai, mbouj miz seisim cij ngaemgyaeuj gaenxguh, gij cingsaenz songde au geiq ndawsim, hag gij yiengh songde!

(2 sat)

"Simjmehveij!" Gou roengzrengz rex daiq hamj gvaq giemxdou, aj bak hemq coh ndawranz, "daiq gou daeuj yawj Ahveij lo!"

Doudangq deng biengj hai, Simjmehveij daj ndawrug byaij okdaeuj, iet song fwngz daeuj rex daiq naengh youq gwnzeij, gou haeujsim yawj Simjmehveij, raen lwgda de youh hoengz youh foeg, beij haxbaenh lij yienhda.

"Aiya, Daiqbyauh, gyo' mbaiq mwngz daeuj yawj....."

Gou bulu buet haeuj ndawrug, ndawde myoxmyad, gou raen Ahveij ninz youq gwnz congz youh gyangz youh ringx, byaij gyawj congz heuh de song sing, de vanzlij caengz rox miz vunz daeuj, gou roxnyinh miz di geizheih, iet fwngz rag fwngz de, sing loq sang cam:

"Ahveij, mwngz roxnyinh baenzlawz yiengh lo?"

De mbouj ringx lo, da' ngwnh yawj gou, hanh gwnz najbyak naed-naed miz haeuxlidu baenzneix hung.

"In, in ha!" De gaenj hemq, "Aiyo, in lai lo....."

Gou ca fwngzgvaz de yaek sijsaeq yawj gij baksieng lwgfwngz de seiz, de au fwngzswix roengzrengz baez nyoengx gou, sup dauq fwngzgvaz,

•Sawcuenhraz Lwngyez•

Gij Golwngyez Henz Dahhoengz

红 水 谣

□ Lanz Haijyangz Moz Beibei / 蓝海洋 莫蓓蓓

song fwngz nyaenx dungx, swenj-yauyau dwk:

"Dungx gou in! Dungx gou in....."

"Ha?"

Gou doeksaet yat, riengjret cienq ndang buet ok rog bae, Simjmehveij cingq rex daiq yaek byaij haeujdaeuj, gou gyauej ndeu dawj haeuj ndaw-rungj Simjmehveij bae.

"Ahbyauh, ai——" Simjmehveij fwngz ndeu nyaenx aek bonjfaenh, fwngz ndeu rex begdou heuh le sing ndeu.

"Cuet, Ahveij dungx in, daiq!"

Gou hujdengdeng hemq, gaenq mbouj ndaej goq caeuq Simjmehveij boizleix lo.

"Ha? Dungx in?" Daiq saenzdedded byaij coh naj congz.

"Haxbaenh de itcig heuh dungx

in, aiq dwg gwn le ywdoj." Simjmehveij dauqfanj beij gou caeuq daiq lij caemdingh.

Daiq naengh youq henzcong, rag fwngz Ahveij, youh lumhlumh najbyak de, Ahveij gwq fan bae foek dauq, ndawbak gyangz mbouj dingz.

Daihngiehsam Ciq Cax Gaj Vunz

Caemrwgrwg yaep he.

"Ai, din fwngz gyoetcaep, aen dungx ndaemqleq, gij ywdoj haenx mbouj deng, itdingh dwg——" Gij sing daiq miz di saenzdedded, gangj ndaej gaenjdwdwg, "Ahbyauh, vaiq-di, vaiqdi bae ra bohgox mwngz daeuj."

"Aeu gou haeuj ndawsingz bae ra de?" Gou yaek yo din couh buet cam.

"Seizneix de wnggai gaenq dauqdaeuj lo, mbouj dauqranz, itdingh dwg youq ndaw hagdangz caeuq yaucangj laux gangjgoj? Vaiqdi buet bae, yied vaiq yied ndei!"

"Baenzlawz? Nanzdauh Ahveij....."

Gou yamq ok giemxdou seiz, ndaejnyi Simjmehveij youh daej youh hemq, ndawsim gou doq suk baez he, gou lau Ahveij ok maz saeh, ndigah song ga buet yat lumj mbin, yienznaeuz gou bingzciengz mbouj haengj Ahveij geijlai, hoeng seizneix gou cix nyienh sai gij rengz sojmiz bae gouq de. Aulungzgeiz caen dwg vunzrwix, caen deng daiq ngeix dahraix, dungxsaej de beij duzngwzdoeg lij doeg, daengdaengq au gij ywdoeg daeuj haih dai Ahveij, boizhaemz Simjmehveij.....

(caengz sat)